

## 15.NETEHNIČKI REZIME

Hifa-Oil d.o.o. Tešanj predstavlja firmu koja se bavi distribucijom nafte i naftnih derivata putem maloprodaje i ima veliki značaj u Federaciji BiH, te teži ka ostvarenju zadovoljenja kupaca svojim stalnim poboljšanjima u poslovanju i unapređenju kvalitete proizvoda i usluga kroz angažovanje mladog i dobro obučenog kadra.

Na postojećoj lokaciji u obuhvatu stare industrijske zone „Unis“, na kojem je bila locirana firma Unis-Pretis Sarajevo, u sklopu energetskeg bloka, je već ranije egzistirala benzinska pumpa sa izgrađenim objektima, koja se sastojala od privredne zgrade i pet podzemnih rezervoara za gorivo.

Naime, 1986.godine u obuhvatu industrijske zone „Unis“, u sklopu energetskeg bloka, je izgrađena benzinska pumpa za vlastite potrebe firme „Unis-Pretis“ Sarajevo, koja se sastojala od pumpne stanice za pretakanje (oznaka M.141/3), pretakališta(oznaka M141/1) i pet ukopanih rezervoara (oznaka M141/1).

Investitor objekta je bila Vojna pošta VP 7945 Beograd, projektant VP 99489 Beograd (SFRJ). Objekat je prije rata bio u funkciji, dok su tokom rata zaustavljene aktivnosti u predmetnom objektu.

U postupku privatizacije, Hifa-Oil d.o.o. Tešanj je prepoznala mogućnost i šansu u daljem razvoju dijela industrijske zone, odnosno prijeratnog fabričkog kompleksa „Unis“ u Vogošći, te je posredstvom Agencije za privatizaciju F BiH, kupila predmetni kompleks, te u cilju reaktiviranja navedene benzinske stanice koja je egzistirala u sklopu devastirane stare industrijske zone, dana 23.03.2011.godine sklopila Ugovor br.03-19-137-19/11 sa društvom Unis-Pretis d.o.o. Vogošća, Igmanska br.1, Vogošća (Prilog 5), na osnovu kojeg je kupila parcelu označenu na k.č.1064/5, po novom premjeru 2751/55, K.O.Gornja Vogošća-Vogošća, iz Z.K.uloška br.3181, pri čemu je navedeni Ugovor ovjeren takođe i od Agencije za privatizaciju u Federaciji Bosne i Hercegovine.

Na osnovu gore navedenog društvo Hifa-Oil d.o.o. Tešanj je preuzelo predmetnu benzinsku pumpu, koja je postala vlasništvo društva Hifa-Oil d.o.o. Tešanj. Postojeće postrojenje benzinske pumpe sa pratećim sadržajima za pretakanje više vrsta goriva je bilo djelimično devastirano. Navedeno postrojenje se sastojalo od pet ukopanih dvoplaštnih rezervoara (interne oznake R1 do R5), svaki zapremine po 100 m<sup>3</sup> i privredne zgrade.

Društvo Hifa-Oil d.o.o. Tešanj je donijelo odluku da će izvršiti rekonstrukciju benzinske pumpe i istu ponovno staviti u funkciju, tako da će u prva dva rezervoara (R1 i R2) skladištiti kerozin, a u druga tri rezervoara skladištiti dizel D-5. Pretakanje će se obavljati na postojećem pretakalištu. Posao stavljanja u funkciju ranije benzinske pumpe će se odvijati u dvije faze.

**I Faza** podrazumijeva, da će osposobiti dva podzemna rezervoara R1 i R2 za skladištenje i pretakanje kerozina, kao mlaznog goriva, vrste JET A-1, za potrebe snadbijevanja Međunarodnog aerodroma u Sarajevu.

**II faza** podrazumijeva da će se u tri preostala od pet rezervoara (R3, R4 i R5) skladištiti i pretakati drugi naftni derivati, odnosno dizel gorivo.

Predmet ovog zahtjeva za izdavanje okolinske dozvole su dva podzemna rezervoara, svaki kapaciteta po 100 m<sup>3</sup>, u kojima se namjerava skladištiti mlazno gorivo kerozin JET A-1., u sklopu Projekta I-Faze sanacije i dogradnje postrojenja za tečna goriva za potrebe skladištenja kerozina za potrebe vanjskih potrošača.

Društvo Hifa-Oil d.o.o. je ishodovalo Upotrebnu dozvolu br.05-23-26677/16, dana 16.08.2016.godine, kojom se utvrđuje, da su radovi na izgrađenom objektu benzinska pumpa, koja se sastoji od privredne zgrade i dva rezervoara za gorivo-kerozin u Vogošći, u obuhvatu privredne zone „Unis“, izgrađeni na osnovu ovjerene projektne dokumentacije, te se isti kao tehnički ispravno izvedeni mogu koristiti kao posebna cjelina.

Navedeni derivat se nabavlja od najvećeg svjetskog distributera JET A-1 goriva, kompanije Kuwait Petroleum International Aviation Co Ltd. Iz Velike Britanije, sa kojom Hifa-Oil d.o.o. Tešanj ima potpisan ugovor i efikasnu poslovnu saradnju. Njihovo skladište, kao i sva otprema za Evropu ide iz Luke Kopar.

Prevoz, uvoz (špeditorske usluge i carinsko posredovanje), kao i manipulaciju robom će vršiti društvo Hifa-Oil d.o.o. Tešanj i firme sa kojima će Hifa-Oil d.o.o. potpisati ugovore o poslovnoj saradnji.

U skladu sa gore navedenim, u proteklom periodu je izvršena rekonstrukcija predmetne benzinske pumpe, u smislu pregleda i ispitivanja sredstava i opreme, od strane certificirane firme za obavljanje poslova periodičnih pregleda, mjerenja i ispitivanja na elektroenergetskim postrojenjima, električnim uređajima i električnim instalacijama na elektroenergetskim objektima i građevinama.

U Planu upravljanja otpadom, koji je sastavni dio ovog Zahtjeva, je navedena klasifikacija nastalog otpada tokom rekonstrukcije Naftnog terminala “Vogošća”, kao i klasifikacija otpada koji će nastajati u toku rada rekonstruisanog Naftnog terminala.